

東越文苑

東越文苑卷之四

明侯官陳

鳴鶴汝翔輯撰

趙世顯仁甫訂正

邑後學郭柏蔚增訂

宋東越文苑列傳第四

李彌遜字侶之唐室之苗裔也世居陳留八世祖澄爲
永嘉令遷於連江遂爲閩人王父餘慶知常州卒於官
因居吳縣復爲吳人彌遜登大觀三年進士累官起居
郎以上封事切諫貶知廬山縣宣和末彌遜知冀州會

元术犯河朔彌遜乃選勇士邀其游騎擊之大破殺金人甚眾其後元术北還不敢近冀邊界紹興七年復遷起居郎而論事鯁直如故稍遷試戶部侍郎當此時秦檜議欲行成於金尊之爲帝彌遜力言其不便上令公卿列侯集議莫敢難獨彌遜爭之丞相檜畏其口力未有以傷也乃私謂之曰君毋然異議當以政府相挽彌遜正辭拒之曰國且不保政府奚居明日復上疏其言愈切然終無可奈何彌遜旣絀遂自免上不許明年乃許以徽猷閣學士知漳州尋歸連江隱於西山卒諡忠

肅有奏議三卷外制二卷議古三卷詩十卷

鄭昌齡字賓德人字夢錫宣和進士家居當秦檜柄用時檜雅聞昌齡才名欲要以美官致之門下令其客以書諭意昌齡謝以詩曰先生傲睨醉官旁不覺滂沱入醉鄉來書恐是醉中語使我大笑譏荒唐檜得詩終欲致之以太常簿召昌齡昌齡不赴後調本路機宜文字終承議郎竟未嘗曳裾於檜之門

黃祖舜字繼道福清人舉宣和進士

蔚按萬曆府志宣和六年進士資政

殿學士通

紹興閒累官權刑部侍郎祖舜學通諸經立

朝侃侃所著有歷代史議及文集十五卷

蔚按府志黃祖舜徽宗時

進論語講義又著有易說國風小雅說禮記說歷代史議及遺文十五卷

高登字彥先涇浦人宣和間受業太學補博士弟子登性踴躍不偶於齊輩顧獨喜同舍生陳東林遇之爲人深相愛也此三人者數好上書排擊大臣語具宋史陳東傳靖康元年金人逼汴城據牟駝岡六館諸生無不人人震驚謀欲遁身逃命登正色立館下責之曰誰令公來學平居誦法聖賢仰天子奉賜今虜至公等皆去誰與天子守社稷者乃請以死隨駕不敢有貳紹興初

登爲富川主簿爲主簿三年當代去富川民無老壯皆爲垂涕詣太守乞高主簿亡代不得乃相率餽百金不告姓名白於太守曰高主簿貧無以養願因太守進百金用爲糲糲之費太守言之登登辭謝不知所歸乃置於學官益市經史以教邑中子弟丞相秦檜不說之也以危法中登編管容州使者持省符示之登讀畢卽上馬就道使者曰卽少入與家人訣何傷登曰君命不可稽也竟去不顧至容州授徒以資朝夕每得家人音息毫不爲蒂芥惟聞朝廷懸令有不便者小則輦感大則

勸哭隨之及臨命所言皆天下大計所著有東溪集按

漳州府志彥先少失父事母至孝嘗舟行阻風念無以奉晨羞忽有白魚躍于舟母病思鹿肉夜有虎啣鹿置其門所著有家論等篇及東溪集若干卷後朱文公為守作祠堂記成化間縣人吳震請于朝立祠本邑有司春秋行祭

鄧祚字成材沙縣人建炎二年進士為建昌軍簽判會

金虜破洪州傳檄建昌建昌守顛恐議以城降祚毅然

斥之曰虜至當殺之不則有死耳何言降乎守大怒欲

執祚以畀虜祚終不屈遂棄官歸所著有焦桐集是時

順昌余良弼與祚同年舉者也有龍山集

詹慥字應之崇安人家無瓶粟之儲未嘗以織芥受於人其爲文操筆立就若宿構然有文集二十卷

按慥爲新豐尉

楊公度者浦城人父訓少時與蔡京俱事王安石受學及京當路欲見之使余深謂訓訓曰吾幸勤學自立今老矣旣無意於榮除異日者又可與諸公爲嶺嶠之行哉公度善爲文政和中與秦檜弟梓同登第梓嘗稱公度於檜已乃告公度曰子見吾兄可以通子之願公度曰昔吾先人不見蔡丞相以不能僕僕於嶺嶠耳吾顧能之乎卒謝不見檜歷官福建提舉常平司主管所著

玉峯集二十卷

李安期邵武人也好持高節游於江湖聞岳飛死立起如臨安作表忠詩百二十首弔之已而游蜀以詩謁茶馬使王涯涯奇其才將以賢良舉之有期矣會與安期奕爭道安期推枰怒曰公平章天下亦可如此反覆乎遂拂衣去涯乃媿謝固留安期安期竟去終身不見有蒙谷詩集行於世

陳知柔字體仁永春人以紹興十二年與秦檜子熿同舉進士諸與熿同舉進士者莫不走檜取寵知柔獨自

引以故齟齬不得志遂不肯仕宦好浪游於山水間矧
柔貧甚寓居僧房四壁蕭然然諸生從之戶屢常滿而
知柔益豪置酒賦詩意豁如也所著詩話五卷古學并
圖二卷詩聲譜二卷詩騷古賦十有餘篇勅按陳知柔
自號休齋紹
興十二年進士官安撫司叅議鼓山靈源
洞烏石山天章臺俱有陳休齋曾來石刻

陳元老福安人有城山集

徐詡字元敏浦城人登紹興中進士有東野居士集四
十卷

吳岡字雅山晉江人初與貢籍不得第取所業焚之曰

是不足學於是益發經籍抽繹之紹興中乃第教授邵
峽二州有詩集六卷

陳俊卿字應求莆田人登紹興進士乾道四年拜尙書
右僕射同中書門下平章事以少師魏國公致仕其卒

也朱熹枉千里哭之狀其行以傳其爲人可槩矣俊卿

有文第二十卷

蔚按俊卿既相以用人爲己任所除吏皆一勝選每接朝士及牧守自遠至必

問以時政得失人才賢否薨年七十四方屬疾子書示諸子勿祈恩澤勿請謚樹碑上聞嗟悼輟朝贈太保諡正獻俊卿孝友忠敬得于天資在朝正色危論無顧避凡所奏請皆關治亂安危之大者又按湯幢小品云陳僕射謁九仙祠問功名夢仙云前程在黃公度口陳過黃黃曰我狀元子榜眼陳曰何尊已而卑人黃曰然則

狀元爾榜眼我廷試黃果元陳次之高宗問曰鄉土何
奇黃日披綿黃雀美通印子魚肥陳曰地瘦栽松柏家
貧子讀書高宗曰公
不如卿改陳爲元

黃公度字師憲莆田人紹興八年舉省元賜進士第一

公度工詩而祖杜甫詩並雜文凡十二卷號知稼集

蔚按

蘭陔詩話云公與趙丞相鼎善爲秦檜所惡泉幕任滿
赴調知不見容過分水嶺題詩云鳴咽泉流萬仞峯斷
腸從此各西東誰知不作多時別依舊相逢滄海中及
除正字言官希旨誣公將作私史以謗朝政因罷歸時
趙丞相已謫湖陽讒者復據前詩謂指趙與已不久當
偕還中都也檜益怒遂以嶺南荒惡地處之公有咏梅
眼媚兒詞云如今憔悴蠻烟瘴雨誰肯搜尋蓋自况也

林外字豈塵晉江人以紹興末舉進士爲興化令外少

時受業上庠嘗獨游於西湖從垂虹亭酤飲終日不醉
 題詩壁閒曰藥爐丹竈舊生涯白雲深處是吾家江城
 戀酒不歸去老却碧桃無限花外之游角巾鶴氅丰姿
 都雅及題詩諸游者見之以為神仙明日遂喧傳於都
 下外有詩集曰嬾窠類稿

高曇字子雲林浞字正甫皆長溪人紹興末同舉進士
 曇有詩文二十卷浞有槃隱集是時同安薛舜俞亦紹
 興進士有文集三百卷

吳獬龍溪人也葛按龍溪縣志其友陳知柔稱之曰獬
作吳獬字清臣

也有古貌古心焉使其著書何必復讓揚子雲而獬有

省齋集

陳讜仙游人父豐

蔚按豐仙遊志作豐

以詞賦爲福建漕薦第一

尋中博學宏詞科爲國子博士讜少禪家學而書法遒勁比於蔡君謨讜年十二爲山寇所執露刃脅之讜顏色自如不失其度旣而寇驅以前行至峻崖讜乘閒自投崖下因馳而逸弱冠入太學會當以父任爲郎讜讓不受以隆興元年登進士爲集英殿修撰封清源郡侯蔣雛字元肅仙游人雛年少時與先輩宋藻論經傳書

疏藻不能窮號雝爲南方夫子雖以詞賦薦登進士第
拜永州守王十朋見其文大異之遂引與爲友雝因作
夢仙賦以獻十朋比之長卿大人李白大鵬也

彭止字應期崇安詩人也嘗謁辛棄疾值其晝寢止題

詩於齋而去

詩曰茶子聲乾暗接塵千牕詩夢暖於春清風不動階前竹誰道今朝有故人棄

疾覺而追之延留累月止詩清麗典雅有刻鵠集行世

黃洽字德潤侯官人事光宗知樞密院事洽質直端重

有大臣體立朝多所論列然未嘗攜人隱慝以累其終

身有文集八十五卷

蔚按洽有文集奏議八十五卷事詳宋史

鄭昭先字景紹閩縣人以淳熙進士歷知樞密院事進
右丞相辭不拜昭先輔政沉重鎮靜愛護人才卒謚文
靖有日湖遺藁五十卷

林亦之字學可福清人林光朝之高弟也有考工記解

莊子奧解半皆門人所述惟玉融志數卷詩數卷則其

手筆蔚按府志亦之著有易講毛詩集解十二卷學者稱爲綱山先生私謚

文介景定間詔贈迪功郎蔚按居易錄云內閣藏書目錄載林光朝謙之艾軒集二

十三卷闕第三第四第二十一第二十三
林亦之學可樂軒集十六卷闕第八卷

莊夏字子禮永春人弱冠以治禮著名郡博士張叔椿

視夏文大奇之不獨於經遠也因令夏受業上庠夏遂
登淳熙八年進士知興國縣慶元六年大旱有詔求直
言夏上封事曰君者陽也臣者君之陰也今威福下移
此陰勝也積陰之極陽氣散亂而不收其弊爲火災爲
旱蝗疏奏召爲太常博士數論諫皆當世之急歷封永
春縣開國男有遺文三十卷國史大事記十帙典故五

帙

方秉白莆田人當孝宗時與從弟秉侯隱於布衣秉白
居草堂以教憲臣聞其孝廉言上召之不起秉白有草

堂集郡守趙彥礪辟之編莆陽志數卷

袁樞字仲機建安人也當孝宗時以詞賦試禮部擢爲第一上乃拜樞爲太學錄是時知閣門張說以吳皇后妹聳拜簽書樞密院事樞乃言於上曰異哉陛下之以政聽說也而何以慰士大夫之心哉獨不念示天下私乎上默然而色不怡樞退詣宰相虞允文曰君乃不耻與噲等伍耶而與近習當軸也臣請從此去矣因出爲嚴州教授旣不得意乃著書因司馬光通鑑區別其事而貫通之號通鑑紀事居有頃參知政事龔茂良奏於

上上讀而善之乃以宗正簿召樞登對樞卽因史書厯陳往事自漢武而下至唐文宗偏聽奸佞致於禍亂上曰善遷太府丞兼國史院編修於是章惇家樞鄉人也請得緣飾惇傳樞曰鄉人私情也國史公議也吾奈何以私害公卒不聽其後累擢右文殿修撰天下稱仲機不鬻筆也所著有童子問

蔚按建甯府志袁樞字機仲著有易傳解義辯異

陳居仁字安行莆田人家於明州父曰膏與秦檜有雅素居仁以父任爲郎後乃舉進士秦檜爲丞相以居仁通家子欲見之收齒門下居仁戢身避之不與通以故

居仁宦數抑厭不得志乾道六年樞密使虞允文方以議復陵寢得幸上允文聞居仁賢數使人召居仁居仁常謝不見也後以職事見允文於公署允文引與論兵居仁復謝不能退而貽書允文以爲天下事謀不素定者不可以輕試若大言以快耳何益於成事而徒以國試虜也居仁以議不合不欲留內遷爲徽州太守徽州大治爲天下第一上聞召以爲朝議大夫兼詳定飭令權中書舍人上嘗欲爵貴倖褻臣屬居仁草制居仁再封繳還之卽刀鋸斲臣頸臣終不敢奉詔居仁爲人風

度凝遠與人交底裏上露士以此多歸之所著詩文數卷

林彖字商卿莆田人外王父陳汝升

蔚按仙遊縣志作次升

汝升

者好藏書書數千卷至富彖少喪父從母鞠於汝升以故得盡讀其書無所不覽彖既長奉母歸其家身自供養不肯婚娶其昆弟咸謂彖胡不受室彖曰彖有二弟在苟先人毋廢祀皆林氏後也卽彖受室奚加焉彖母卒遂避家居於僧寺

蔚按彖自號萍齋隱於寶幢山龍華寺者四十年

隆興元

年上初卽位銳意恢復閩監司帥臣咸言彖於上上召

彖赴行在彖力以疾辭於是丞相陳康伯樞密黃祖舜
記下興化郡縣親詣彖趣遣之彖遂稱疾篤既而孝宗
再下詔徵彖彖終不起乾道四年詔特賜進士出身添
差興化軍教授卒

陳德豫字子順連江人淳熙中登進士乙科蔚按萬曆

熙十四年進士為大理卿有文稿三十卷蔚按尚友錄德豫少

百家之旨淳熙中登進士甲科調建州戶曹試教官首
選分教宣城郡學舊有二程遺文時禁程氏學台焚毀
之德豫護藏唯謹改京教累遷諸軍糧料院歲早求言
德豫上封事以諱天變諱人言為致早之由乞去二諱
以回天變上嘉納之又累遷著作郎會胡僧入覲錫子
甚豐乃歷陳梁武之失異端邪說不足信即日有旨出

胡僧於國門之外官至大理卿

楊炳字若晦晉江人精於左氏登淳熙進士爲中書舍
人有西掖藁諫垣存稿

陳成父字汝玉甯德人父駿登進士受業於朱文公爲
弟子成父少習父學而有才名辛棄疾之持憲於閩也
亦才成父乃以女子之成父安貧守道不以婦家故少
自潤棄疾益賢之亦未嘗敢以貧故遇之敢失禮成父
所著有律歷志解和稼軒辭默齋集

留正字仲至泉州人紹興元年爲左丞相當此之時壽

皇居重華宮帝以疾不數朝五年壽皇病甚留正請帝侍疾爭之彊帝怒拂衣起正引裾泣諫隨至福甯殿門闔慟哭而出及壽皇崩帝以疾不能執喪正上疏固請立嘉王爲太子執喪帝不聽復請對不報正遂出國門上表請老不待報而行甯宗卽位使使召正復以爲相進爵少傅正辭不拜曰陛下勉狗羣情以登大寶事當從簡示天下以不得已非頒爵時也久之爲韓侂胄所開以少師判建康府卒贈太師諡忠宣有詩文行於世黃耆字景仁甯德人紹熙初武舉第四人開禧初復登

進士知德慶州文章政事皆有聲於時所著詩文號胖
軒集

敖陶孫字器之福清人當光宗時以秀才游太學太學
諸生皆以陶孫能詩下筆立就無不推高陶孫是時韓
侂冑方貴幸用事深嫉朱熹趙汝愚而讒之朱熹之罷
也陶孫首贈以詩侂冑固已含怒及慶元元年安置趙
汝愚於永州汝愚行至衡州暴卒敖陶孫又縣詩於都
市曰左手旋乾右轉坤云何羣小肆流言狼胡無地容
姬旦魚腹終天葬屈原一死固知公不免孤忠賴有史

長存九原若遇韓忠獻休說渠家末代孫侂冑見之大

怒購求陶孫將甘心焉陶孫乃變姓名亡命得免久之

乃稍稍出登進士蔚按慶元五年進士爲溫陵僉判蔚按陶孫著有臞翁集二

卷府志作臞庵集又按居易錄云敖陶孫器之臞翁集
古詩歌行頗有盛時江西風氣其詩評尤爲談藝家所

推引

黃定字太蔚按萬曆府志作泰之永福人乾道中舉進士第一有

黃狀元文集

顏棫字叔堅永春人洎熙中以上舍釋褐爲温州判官
累遷中書舍人兼直學士院棫訓詞雅麗有大體金人

聞其名敬慕之稱顏舍人焉所著詩文四十卷

鄧林福清人陳震晉江人皆潛熙進士林有虛齋文集
震有史編及詩文數十卷

黃銖字子厚崇安人少與朱熹俱事劉子翬熹自以能
不及黃銖銖爲文學司馬遷詩學屈宋曹劉而下及韋
應物尤喜琴書隸法甚古得魏晉以前筆意其於騷詞
能以楚聲古韻爲之旣卒熹爲序其文

柯夢得字東海莆田人嘉定中以特科入官夢得生平
苦吟而喜孟東野之爲詩所著有抱甕集十五卷

蔚按
莆田

縣志柯夢得著有
選唐絕句行世

徐鳳字子儀浦城人以進士當甯宗理宗時出入於翰
苑數媿媿論事著十箴一卷內制十卷文集二十卷

詹師文字叔簡崇安人登慶元中進士有幔亭遺藁通
典編要

方信孺字孚若莆田人也父崧蔚按崧應
作崧卿分信孺財累

千金信孺隨手散之賓客殆盡終無然疑之志以故士
皆往歸信孺信孺皆舍業厚遇之客奉或不給卽假貸
旁近縣賢豪舍養之開禧三年以父任爲國信所參謀

官使金至濠州金元帥紇石烈子仁閉信孺獄中露又環守之絕其薪水要以五事稱臣一割地二還俘獲三罪首謀四增歲幣五信孺曰反俘歸幣可也縛送首謀自古無之稱藩割地則非臣子所宜言矣子仁怒曰若乃不望生還耶信孺曰吾將命出國時已置生死於度外矣子仁不能屈至汴見左丞相完顏宗浩宗浩陳兵劫之終不能屈歸而反命於韓侂胄侂胄問以五事云何信孺曰欲得太師頭耳侂胄大怒奪信孺三秩臨江軍居住其年侂胄伏誅明年王柟還自汴具言信孺功

狀乃詔信孺得自便累遷真州太守免歸居於巖竇日
共具設酒食與賓客燕飲賦詩相娛樂竟病酒卒有詩
二十卷

留元剛字茂潛晉江人開禧三年試博學宏詞科累遷
直學士院出知温州元剛早負盛名而久宦不遂其志
乃歸築圃於北山居之號雲麓有雲麓集其文多奇峭

陳洽字澤南同安人登慶元閒進士通判廣州

蔚按同安縣志

陳洽入太學慶元二年進士歷簽判韶

州知懷安漳浦溧水三縣通判廣州 真德秀薦洽文

章根平義理政事出於慈祥未召卒有文集數十卷

林仲虎字景瞻甯德人仲虎善屬文賦詩而用武顯慶
元中應武舉廷試第二嘉定初檢校林柄使於金辟仲
虎與偕金主聞仲虎賢乃使人私邀仲虎終不能致既
至金人設宴於廷引宋使者是時適值宣仁后忌日仲
虎堅持不肯拜宴虜不能奪仲虎已致命而歸心知其
盟不堅也乃上疏其略曰樂因循者狙於私意言進取
者病於寡謀爲今之計當重發而必成不可輕出而苟
且疏入執政者惡之出仲虎守浮光仲虎有林景瞻詩

集

劉用行字聖與南安人嘉定進士其詩文典麗爲工有北山漫游集十卷雜藁二十卷

李仲光字景溫哀長吉字叔巽俱崇安人仲光開熙中

進士有肯堂集長吉嘉定中進士有雞肋集

蔚按尙友錄云叔巽

致仕後號委順翁徜徉林泉託興吟咏雖老手不釋卷

黃學行字上文惠安人登嘉定戊辰進士所著有史說

有坦齋類集

劉克莊字潛夫莆田人父彌正窮宗時爲戶部侍郎克莊以父任補宣教郎理宗卽位直學士院真德秀言克

莊於上克莊學貫古今文追騷雅可用也上於是召克莊以爲樞密院編修淳祐六年特賜同進士出身領史職兼兩制以數切諫數斥外官終工部尙書致仕加龍圖閣學士卒諡文定所著有後村四集

蔚按居易錄云劉克莊後村大

全集六十卷自四十六卷以後皆詩話詩餘無詩首有林希逸二序

潘昉字廷堅閩縣人少善爲詩尤長於樂府當甯宗崩史彌遠矯詔廢故太子竑立理宗爲天子尋殺竑於湖州端平二年有詔策進士昉對策曰陛下之立天寶開之而乃歸陰德於匹夫不亦誣乎且濟王陛下手足也

生榮死哀乃不得視於士庶人其如天下何策奏出犝
爲鎮南軍節度推官瀆祐初丞相游侶心善犝言召欲
用之而犝已卒有詩集數卷

蔚按潘犝詩四卷樂府一卷

翁甫字景山崇安人以進士厯官國子院編修所著有
蜀漢書浩堂類藁

蔚按翁甫寶厯進士著有英雄錄外制集奏稿讀書壁記西安南昌判筆

翁合崇安人景定中爲侍講有丹山集

方惟深字子通莆田人

蔚按曾慥詩選作姑蘇人

父龜年景祐中進

士與蘇緘齊名有經史解題四十五卷郡書新語十卷
卒葬姑蘇惟深遂占著焉舉進士不第晚爲興化軍助

教蔚按蒲風清籟集崇甯五年特奏名授興化軍教授王安石喜其詩精詣警絕

元白陸皮有不及者惟深有秘校集

洪天錫字君疇晉江人寶慶二年進士爲監察御史好直言骨鯁中貴人嬖幸者皆恐毋敢縱然亦以此不得立朝與論議度宗卽位累擢之不起最後召爲刑部尙書詔守臣趣之旣而進顯文閣直學士御札日至終不起所著有味言發墨陽巖文集

何伸莆田人大父德以戰功爲都指揮使伸少喜吟詩德誚其不武伸乃習馳射擊刺之事然感事傷時輒復

洩之於詩如故自開禧用兵仲應召從軍每都試畢輒
陳詩自見陳宓視其詩喜之遇以爲客見仲於劉克莊
克莊亦喜大與仲交恨得仲晚仲子謙亦能詩視仲尤
組麗精密陳韓自莆守起爲邊臣從宓求得謙遂與同
載而往

李丑父字良翁莆田人父宗之通判邵武軍以文名丑
父爲童子喜讀書解其義出語驚人旣已娶婦恒獨居
讀至於達旦善詩文溫潤清新也年四十始舉於鄉端
平二年以進士除著作郎有亭山文集

李元白者名齊甯化人也雅不喜應舉言而肆力於詩宗之杜甫初王安石作集句體元白效之以集杜句爲一編行於世又集大觀昇平詞進之天子天子以爲奇授元白初品官元白遂歸故廬終身不仕

方醕道字溫叟莆田人嘗知南劍州以清儉自持有筆峯集五卷杜陵詩評十卷類集詩史三十卷子畢爲潛江簿有詩集曰荆南叢錄

陳英字義叟長溪人其學無所不窺士大夫多受學焉其詩文有樂天集十卷

黃館長溪人其詩文有帶金集

張安脩字孟堅甯德人安脩嘗領漕舉以子文虎登第
遂賜承務郎歸老有翠樾詩集

林文之字子彬福清人宋季文體纖弱文之獨用意迫

古作者有若存文集

蔚按通志林文之著有通鑑綱目朱墨

余發林字希董古田人也以進士爲崇安尉

蔚按余發林咸淳七

年進士崇安縣尉

博學有俊才爲文章操筆立就及卒門人編

其文曰愛梅集

余韶字道夫龍溪人嘗舉八行而不肯入官以詩文自

娛有棲靜堂集

蔚按龍溪縣志作余詔
隱東湖號東湖居士

陳經字叔論龍溪人有德齋詩集

蔚按漳州府志及龍溪縣志皆作陳經字

叔綸弱冠登咸清進士嘗學文於曾樽齋雅得其妙尤工於詩時郡守趙汝鎬教授敖陶孫皆推服之著有德齋文集

集

梁藻字仲華長汀人藻樂瀟散以父任當宦不就也有

詩一編曰梁處士集

歐陽凱建陽人有無旁集

蔚按歐陽凱士字彥成建炎間以應舉論事坐譴後得還

許衍同安人有田舍墨記四十卷

蔚按同安縣志許衍隱居苦學博通經術

李琬建甯縣人有李粹之詩集

蔚按建甯縣志李琬字子粹學行爲鄉里所推

尙書葉祖治以八行薦
未受命卒有詩集行世

林仲嘉有詩三卷許拱辰有藍溪集

蔚按許拱辰字元
淵著有玉融新對

卓立

蔚按卓立
字志道

有西溪文集八十卷陳寬有龍門集紀

夢集黃銳有龍山集黃諤

蔚按黃諤
字忠甫

有玉融志容安拾

藁陳革

蔚按陳革
字壯行

有中隱集鄭東起

蔚按鄭東
起初名震

有自然

機籟集以上諸公皆福清人林允中有草堂集古田人

嚴滄浪者名羽字丹立一字儀卿邵武人也嘗著詩法

一卷學者宗之因號滄浪詩法以羽嘗自稱滄浪逋客

云羽少時隱苜溪及宋季避地江楚以故所著詩二卷

失之正德閒稍輯其存者僅百三十餘篇行於世

曾逢震字誠叟閩縣人幼讀書過目成誦隱居道山於書無不周覽生業有無不問也所著詩文號曰月林醜

鏡

蔚按曾逢震從朱文公學事詳烏石山志

童成大字元偉甌甯人也成大博極羣書而究之於性理當宋之季知不可以復振遂隱居不仕

蔚按甌甯縣志成大隱於

醫謝枋得入閩作歌贈之

所著有松壑集

趙必漣字仲連崇安人必漣少好讀書開慶閒以父任當補官辭不受毋落吾讀書也晚乃築室於黃栢里植

梅數百株名曰梅花庄與弟若樾觴咏其中有倚梅咏
葉

趙若樾字自木登咸淳末進士學晚唐之爲詩宋亡遂
不事家人生產浪跡於泉石閒一往輒累日夕蓋有陶
阮之風焉

李權莆田人嘗募林逋陳搏之爲人而念無以顯其親
非孝也乃彊之闕下舉咸淳中進士旣得報卽上疏致
仕求以己官贈其父母已拜疏遂脫綠袍挂於錢塘門
留詩而去其辭曰人言學古思入官我謂學易而官難

平生透出夢覺關本來面目只寒酸吾親不待若爲歡
不如歸去卧林閒殿前三策罄忠肝多謝皇恩天地寬
綠衫卸了白衣還扁舟飛過子陵灘前修亦有逋與搏
聖世待之俱寬閒何物种放人厚顏山鬼移文伐其奸
此行無復出閩山休音息影答考槃今朝醜酒醉雲壇
便向錢塘門挂冠權旣解舟因入會稽山中數年乃返
復邀妻子俱隱不知所之

方澄孫字蒙仲

蔚按蒙仲以字行號烏山

莆田人淳祐六年賜對大

廷

蔚按莆風清籟集作淳祐七年登進士

澄孫策萬餘言皆天下大計遂

擢甲科當此之時賈似道欲自結於澄孫因薦其語妙
天下澄孫耻之卽上書求外補乃出知邵武軍卒蔚按
由邵武知軍入爲秘書丞著有綱錦集所著有通鑑表微洞齋集和劉克
莊梅花百咏

黃仲元字善甫莆田人登咸淳中進士而不肯效官陸
秀夫累薦召之皆不起宋亡變姓名爲淵天叟所著有
經史辯疑四如文稿

黃淼字水心甌甯人淼通經史百家之說皆能精詣景
定閒舉於鄉會宋亡遂隱天湖山繞其居以栢示意後

名辟爲參軍及宋亡天祥死之翱携酒登子陵釣臺設
天祥主於庭隅再拜伏潸慟哭者三以竹如意擊石作
楚歌招之其辭曰魂來何極魂去兮江水黑化爲朱鳥
兮其味焉食天下旣亂翱家散亡無種翱乃脫身游延
建漳泉閒皆亡所遇旣而復游臨安過故宮不勝悽楚
作詩四章其一章曰複道垂楊草復蔚按復西
湖志作欲交武陵
蔚按陵應從
西湖志作林無樹著凌霄野猿引子閒來往覆盡花閒
翡翠巢其二章曰隔江風雨動諸陵無主園池草自春
聞說就中誰最泣女冠猶有舊宮人其三章曰禾黍何

人爲守閣落花臺殿黯銷魂朝元閣下歸來燕不是按蔚

是西湖志作見前頭鸚鵡言其四章曰紫冥樓閣宴流霞今日

淒涼佛子家寒照下山花霧散萬年枝上掛袈裟翎吟

罷伏地哭極哀聞者皆哭居有頃去游姑蘇登夫差臺

慟哭終日反游勾越探禹穴又北向哭終日遂定居於

桐廬嘗以秋莫載薪炭至杭州易米爲食稍裕卽罷不

復載翎之居桐廬也東南諸公之爲詩者多受於翎及

翎卒無子友人方鳳弟子吳思齊方幼學葬之子陵臺

南魂魄不媿於子陵也其後弟子吳貴蔚按貴應作潤買田月

泉精舍奉嘗焉祠曰晞髮處士處士有集百餘卷皆散逸獨晞髮集五卷行於世

論曰余從林方伯懋和家徧讀其藏書書充棟而宋書居三之一以故得備論大都宋人陋左國左國之文至宋蕩然矣詩學杜甫得其糠覈南渡之季稍變其習而國運已移自太祖至欽宗凡九世百有六十八年迨高宗南渡又九世百五十五年士生其時有遇有不遇然皆篤素非齷齪者若李綱留正輩之佞議謀國謝翱二三君子節義皎然嗚呼又何烈也

劉昌言字禹謨南安人生七歲卽善屬文聞於諸公陳洪進之爲平海節度使也召昌言爲功曹叅軍掌牋奏是時太祖已得天下五六年矣昌言累勸洪進納土於宋至太平興國三年洪進乃遣昌言從其子文顯以漳泉二州自歸上上覽洪進表而善之以非昌言無以潤色若此也遂以昌言爲徐州推官後五年開進士科擢昌言爲第二昌言因獻上紀聖德詩五十韻上大說累遷同知樞密院事公卿大臣皆害之乃短昌言操閩音難曉上曰顧朕能曉之耳無何又以昌言委其母與民

妻於卿里而別取旁妻也行薄不可用上曰昌言貧平
因詔賜昌言錢爲其母與妻辦裝得乘傳入京師初昌
言與趙贊善及贊伏誅上自是惡昌言出知襄州後復
入官至工部侍郎卒有文集三十卷蔚按徐氏筆精世
人常言一舉首登
龍虎榜十年身到鳳凰池之句不知此乃宋太宗朝泉
州劉昌言上呂蒙正相公詩也重名清望遍華夷恐是
神仙不可知一舉首登龍虎榜十年身到鳳凰池廟堂
只似無言者門館長如未貴時除却洛京居守外聖朝
賢相復書誰昌言仕至工部侍郎嘗獻
聖德詩五十韻得君之盛未有其比

廖執象順昌人父遜以詩顯仕南唐爲吏執象生七歲
能詩閩漕牛冕召與語大說之引與抗禮甫冠入京師

奏其詩文於太宗太宗每覽一篇未嘗不稱善端拱初
病卒先是陳搏見執象謂之曰子謫仙人也第恐不能
久留塵世耳有集十卷徐鉉爲序

楊億字大年其母懷億時夢有羽衣者告之曰余爲武
夷君也今者爲而子旣而產一鶴鵲家人大駭裹而棄
之溪其季父曰吾聞閒世之人其生必異追至溪畔開
其裹則鶴已蛻爲兒體猶有紫毳尺餘後月餘乃落也
季父乃舉之歸其母億七歲能屬文年十一太宗聞之
召見億語三日不厭試詩賦五篇歛吸而就太宗大說

令謁者送至中書億復爲宰相賦詩一章宰相愕然是
豈庸俗人哉乃爲表上之賀帝得異才左右皆呼萬歲
明日帝下制勅億曰汝方髫髻不由師訓精爽神助文
字生知越景絕塵一日千里予有望於汝也授以秘書
省正字賜袍笏得讀書秘閣有頃以外艱歸蔚按名臣
言行錄楊
億字大年建州人年十一以神童召試太宗親試一賦
二詩頃刻而成上喜送中書再試執政令賦喜朝京闕
詩亦立就且有願秉忠清節淳化中賜進士第還光祿
終身立聖朝之句宰相表賀
寺丞億旣以詞賦得幸上上於宮中行樂常詔億賦之
未有不稱善以此賜億緋魚然億修正志在承弼未嘗

以柔翰婉佞上所得上奉賜輒散之親朋故舊家無奇
羸真宗時累遷左司諫知制誥億爲人剛介寡合士有
片辭可紀者諷誦之又手錄之凡集數千篇號曰筆苑
卽亡賴褊陋者則散之士亦以此多不附焉王欽若陳
彭年心忌其能俱毀之然每毀億上益厚遇之上欲立
劉德妃爲后大臣諫不聽屬億草制億不奉詔上不望
也而更命他學士億於是謁歸省母不待報而行上遂
親緘藥劑及金帛以賜之億官終翰林學士兼史館修
撰卒贈禮部尙書諡文所著有括蒼武夷穎陰韓城退

居汝陽蓬山冠鼇等集共一百九十四卷

蔚按楊大年武夷新集二

十卷景德丁未大年在翰林所自編者詩五卷雜文十一卷大年以西崑體擅名與錢維演等唱和著有西崑

酬唱集億無子以從子紘爲後上以億故賜紘進士紘聚書數萬卷彙其事編輯之曰窺豹篇

蔡伯侁福清人大中祥符間伯侁年四歲應童子科能詩詩如宿學真宗見而異之賜詩曰七閩山水多靈秀四歲奇童出盛時家世應傳清白訓嬰孩自有老成姿纔當學步來朝謁方漸能言便賦詩更勵孜孜圖進益青雲萬里有前期尋拜東宮伴讀官終乾州簽判

蔚按琅邪

代醉編祥符八年以童子蔡伯希爲秘書省正字伯希

年四歲誦書百餘篇上召入禁中應對周詳所誦精習

因命王元美扈言載其歷州郡至八十以列卿致仕按

以官閩書蔡伯希元符初以司農卿致仕年八十七

又按萬曆府志伯希除東宮伴讀歷司門郎中

黃鼇者連江人六歲能詩大中祥符八年應童子舉賜進士

鄭伯玉字寶臣莆田人伯玉生八歲其季父試之曰伐木斧聲聞谷口伯玉卽應聲曰過橋旗影動波心景祐元年第進士歷殿中侍御史伯玉爲人峭直不屈權貴人以此多嫉之年未五十以親老棄官歸鄉里所著有

錦囊集時人重之附以陳琦方孝甯詩稱烏山三賢集
黃伯思字長睿邵武人大父履紹聖初爲御史中丞伯
思數歲讀書日誦千餘言每聽大父講授經史退與他
兒索言之亡墜伯思嘗夢孔雀舞於庭覺而賦之其文
辭典麗其大父見之大驚殆非凡兒也元符三年伯思
以進士起家稍遷秘書郎因得盡讀冊府藏書蓋自詩
書六藝以至百家之說無所不通凡有詔講明前世典
章文物考定商周秦漢彝器及篆隸書畫皆能辯正眞
贗道其本末諸公卿大夫莫不齟唇墨然而心下之伯

思體羸如不勝衣而丰神清灑甚都晚乃喜黃老之學

修道而養壽也有文集五十餘卷東觀餘論上下卷

蔚按

公子訪後序公會校定杜子美集二十二卷槧木流傳又李忠定稱其有東觀文集一百卷

翁邁字仲和崇安人熙甯五年年十三彊記能文爲郡

舉首

蔚按閩書翁邁字和冲年十二爲郡舉首

徐師仁字從聖徐寅之七世孫也師仁七歲其外王父

讀漢書而疑霍光何以稱不學師仁曰伊尹放太甲而

光不知非不學耶坐客大驚大觀三年師仁年十八與

從父昭同登進士第

蔚按蒲風清籟集作大觀二年進士

是時有詔修史

選士之儁者得四人其一卽師仁師仁爲文浩博落筆

輒數千言有壺山集七十卷官至著作郎

蔚按蘭陔詩話從聖與汪

藻倪若川劉大中同被召修史兼次崇文書日得讀未見之書文益汪洋落筆輒數千言與弟子山齊名今集俱不存

宋翔字子飛年七歲劉子翬聞其奇就見之試以燈詩

翔矢口而成若宿構焉紹興中舉進士

蔚按年華錄宋翔字子飛崇安

人年七歲劉子翬命賦燈詩應曰耿耿照幽房熒熒鶴焰長昔年江上女曾到乞餘光劉奇之紹興十年登進士累官國子監簿是時章太后還慈甯宮翔獻紹興樂

府十二章一時名動都下久之以朝散大夫致仕有梅

谷集

莊大成永福人年七歲通五經紹興閒舉童子科

蔚按紹興

中無童子科

淳熙閒以賢良應詔弟鑑亦舉童子科

劉季裴字少度姚瀛字子山皆福清人季裴十歲能文紹興中進士所著有願齋遺稿瀛七歲能誦班史隆興中進士所著有鳳渚集

劉褒字伯寵十歲能屬文登淳熙進士爲朝請郎知泉

州褒以才高見忌歸老於梅山其詩曰梅山集

蔚按詩人玉屑

云劉褒伯寵武夷之文士詩筆甚工嘗宦于朝以臺評而歸有句云去日春鷺吐素絲歸時秋菊剝金衣沙鷗

不入鴛鴦侶依舊滄浪遠
釣磯怨而不怒之辭也

陳舜申連江人七歲能屬文淳熙中舉進士爲著作郎
所著有易鑑渾灑發旨審是集兵書訂解高齋文集子
德一幼亦聰敏經傳子史百家之書靡不通貫紹熙中
舉進士爲朝請郎所著有橫舟文集

熊節字端操建陽人年十歲日讀易二卦必問難得其
指意乃已慶元中廷對稱旨累官通直郎有智仁堂藁
十卷

鄭君老字邦壽長溪人登咸淳四年進士遂乞歸養居

無何君老父母死服未除而宋祚已終元世祖聞其賢
徵之使者星屬至終不起君老年十歲能詩十二綴文
十六舉鄉試第一十七舉進士孝友嗜學學者多宗師
之君老卒學者私謚曰靖節先生所著有梅壑集

廖衡順昌人生而警敏絕人年六歲縣尉催租見之試
以雨中山茶詩其警語有淚多陳后愁離殿浴出楊妃
困倚欄之句尉湖外人也時適得家書因語衡曰洞
庭消息寄來遲衡卽以巫峽夢魂歸去早爲對尉太奇
之名聞於郡郡守以禮致衡試以詩無不立就婉麗可

喜及冠一赴鄉舉不如意遂終其身不復就試

論曰昔蒲衣子生七歲爲舜師畢子五歲佐禹學者
多疑之今觀昌言諸人豈不信然然徐師仁七歲而
知霍光廖衡六歲而知陳后楊妃之事此非資之所
至也倘有釋氏三生之說乎楊億之鶴蜺詎不異哉
阮逸建陽人仁宗時仕爲鎮東軍節度推官是時上求
人可使正樂者未得知杯州鄭向乃進言阮因上其所
撰樂論十二篇并律管十三於是上召見阮使與胡授
同校鍾律分造鐘磬各一虛尋除鎮安軍掌書記上未

之奇也皇祐中上欲更鑄太常鐘磬以爲終無以踰於逸者乃復召逸與瑗議於秘閣遂典作樂事遷尙書員外郎所著有鐘律制議三卷有易筮有王制井田圖

徐復字希顏建州人也或曰莆田人故嘗以文學射策不中退而學易通流衍卦氣法復乃自筮其占奇薄不當得祿於是絕不復射策赴進士舉游學江淮閒數年益通陰陽天文地理遁甲占射諸家之說他日聽其鄉人林鴻範說詩忽悟其所以用於樂因以聲器求之遂得大樂於七音十二律清濁次序及鐘磬侈弇匏竹高

下制度會胡瑗作鐘磬大變古法復嘆曰聖人寓器以聲今不先求其聲而更其器安可用乎後瑗制作皆不效范仲淹過潤州見復剋西方當用兵推其日月後無少差慶厯初與布衣郭京俱召見帝問復以天人之際復對曰以京房易卦推之今年所配年月日時當小過也剛失位而不申其在強君德乎帝曰善然則來歲何屬哉復曰於卦爲乾耳因爲帝說乾爻盡九五而止帝曰善曩歲京師黑風固有應乎復曰其兆在內豫王當之矣帝曰善明日拜復大理評事固以疾辭乃賜號

冲晦處士

蔚按徐復一字復之寅曾孫蘭陵詩話云處士精音律兼通陰陽天文地理遁甲占射諸

家之說與林和靖爲忘年交往來唱和冲晦居萬松嶺和靖居孤山夾湖相望人稱爲西湖二處士其詩亦略類相

蘇頌字子容晉江人頌之學博通而尤明習律歷舉慶
歷二年進士熙甯間與李敏求呂大臨同知制誥當此
之時王安石用事以李定爲御史定壬人也事下知制
誥此三人者三封還之莫肯承制於是安石大怒落此
三人職天下稱之曰熙甯三舍人也而名譽益顯久之
上召頌判尙書吏部是時宋與契丹通好八十餘年盟

誓聘使莫定其儀禮上於是乃令頌草其事以爲非卿
莫能也書成奏上上讀之喜曰此去周易序卦未必有
閒元祐初頌請別制渾天儀上因命頌提舉頌以吏部
令史韓公廉曉算術有巧思遂奏用之授以古法爲臺
三層上設渾儀象下設司晨貫以一機激水轉輪不假
人力時至刻臨則司晨出告星辰躔度所次占候測驗
不差晷刻晝夜晦明皆可推見前此未有也紹聖四年
拜太子少師累爵趙郡公

劉詵字應宿福清人

蔚按萬厯府志劉詵字應宿伯

博讀

書而善知樂以進士當徽宗時上書言歷代雅樂因革及宋制作之旨以是拜爲大成府典樂又云今燕樂之音失於高急曲調之詞至於鄙俚恐不足以召和氣宋火德也音尙徵徵調不可闕臣按古制旋十二宮以七聲得正徵一調惟陛下裁取帝以爲然他日禁中出古鐘二召詵按於都堂詵曰此與今太簇大呂聲協命取大成鐘扣之果應又以鐘無餘韻不如石聲復取合之聲益諧帝喜乃命纂續因革禮

蔚按府志禮字下有制字

官至太常

少卿詵至孝居母喪有雙芝生於墓側云

劉濤者昌言之孫能詩而工於草書徽宗召入禁中令書雪詩濤書首有亂字上不懌而罷人稱濤以書諫也林搏字圖南福清人少以善八行舉入太學政和五年拜爲楚州參軍不赴去隱於其邑之九疊峯以吟詩鼓琴爲事初搏北游從皇甫道士學琴道士却之搏鬱鬱歸至餘杭有僞傳道士死者搏號哭不食曰此音絕矣遂往千里反弔之未入門而慟然道士故無恙乃遂相與大驪盡傳其琴法搏性豪逸未嘗輕鼓於人徽宗聞其名三召之乃至時天下將亂搏爲鼓悲風之操冀幸

以琴心悟上也顧上卒不悟罷之搏有琴譜三卷詩二

卷

蔚按志作
詩三卷

鄭所南一名思肖連江人也以太學生應博學宏詞科
會元兵南下所南猶叩闕上書元人爭目之遂變名思
肖而隱示不忘趙氏也宋社既屋所南居於吳下坐必
南向時時望臨安舊都野哭若狂與客贅聚聞有北人
語者卽引去蓋終其身不與朝士相見云所南工於寫
蘭邑大夫嘗請求不得乃文飾其短長刼之所南曰頭
可砍耳蘭不可得所南嘗自題其蘭曰純是君子絕無

小人深山之中以天爲春又題寒菊曰禦寒不藉冰爲
骨去國自同金鑄心以此知所南之蘭固不妄與人也
論曰先王之世教民以德行道藝藝固儒者事也阮
劉之知樂徐蘇之易理律厯此豈可與淺學者道哉
搏濤寓諫於琴書所南托興於蘭菊雖屈大夫陶彭
澤何以加焉

蘇隨晉江人嘉祐二年爲博羅令隨本詩人好游山水
旣已居官任職鬱鬱不得志嘗屏騶從窮陟羅浮山中
庶幾葛洪而遇之一日睡覺題詩曰夢來鸞鳳到仙家

侍女風流魏月華琥珀杯頤千載酒琉璃瓶種四時花
金函藏籙文刊玉石壁題名篆點砂一枕北窓初睡覺
日移門外柳陰斜於是遂棄官歸脩葆神煉氣之術久
之端坐而化

黃希旦邵武人也熙甯閒居於太乙宮泊然無爲獨時
時歌吟自適旣已卒人復有見之於蜀者以詩寄其友
曰昔游西太乙今日返成都若問去來事雲藏月影孤
其二曰地水火風彊名四大迷蕩真源種種憎愛咄哉
憇癡會卽便會雲散月明廓周沙界

僧無求尤溪劉氏子也少業儒博涉羣書已而棄爲僧
遍游名山而發之詩有塵外趣是時朱松爲尤溪尉以
詩友無求序其詩詩一卷

陳易字體常莆田人少好學該綜經史工五七言詩熙
甯初游太學會太學試士士有奸進者易耻之卽南歸
閩棄其舊學去學易學於仙游張弼自謂於爻象得五
行醫卜地理之術也久之復去學佛遂與學佛人曰需
者結廬於邑之蔡溪居之蔚按仙遊縣志遠軍絕慾日
惟一飯旣而需他徙易乃獨居寄炊於山下香泉寺日

致飯一盂或遇風雨溪漲至經旬不食如是者五十年
崇甯初興化太守郭重舉易遺逸又舉易八行易辭以
牋曰早粗修於八行晚但了於一心心既本無行亦何
有於是重不敢強易爲人無忤視無僞言與人居或終
日不一語語卽教以孝弟及老莊釋氏之意人莫得而
測也

蔚按陳易著有
石門蟬蛻集

馮觀國者自稱無町畦道人邵武人也好以詩贈人語
不可曉其後視之皆其人未來禍福盡驗或有誚其醉
狂者觀國謝以詩曰踏遍紅塵四百州幾多風月是良

儔朝來應笑酖顏叟道不相同風馬牛紹興中端坐而逝

白玉蟾字白叟本姓葛名曰長庚閩清人也大父爲瓊州教授因不復歸玉蟾早孤遂從其母姓以白然玉蟾屢變其姓名人皆稱之玉蟾七歲能詩賦背誦九經長益博洽儒術好飲酒任性每飲酣掀髯伸紙運墨如風頃刻數千萬言率闕肆詭奇離合以三氏初玉蟾游於黎母山遇神人受以洞立雷法後居武夷山出有入無飛昇隱顯莫窮其妙嘉定中詔徵赴闕館於太乙宮一

日不知所往所著有白真人集

曹山釋耽章者莆田人其家姓黃氏耽章幼奇逸能詩年十九棄家爲僧淨業精進而詩不廢南州帥聞其名遣使禮致之耽章以詩付使者曰摧殘古木倚寒林幾度逢春不變心樵客見之猶不採郢人何事苦搜尋蔚就章黃姓入靈石山爲僧咸通中謁長安晤本僧公份稱之由是名冠叢林後居曹山號木寂南平王鍾傳以禮致之不往偈答云摧殘枯木倚寒林幾度逢春不變心樵客見之猶不採郢人何事苦搜尋

無住道人者閩人不知閩何許人孩時爲雲游僧竊而之南海之楚之蜀長於五臺山老於永嘉稱曰無住道

人道入幼不識一丁年五十忽入定四十餘日乃出出而矢口爲詩文皆沉着有味有集四卷

論曰蘇隨黃希旦諸人者立乎釋乎其緒餘皆以發藻爲聲然隨與易視榮名若腐鼠棄之觀國以先知二僧以蕩累此皆心性靈徹非苟然者至若希旦玉蟾及無住道人則渡生死海而登彼岸豈與曹唐靈一輩爭奇五字哉

傳自得字安道其先濟源人父察當蔡京之爲相遣子攸左顧於察將女之察拒弗答也宣和七年以吏部員

外郎接伴金使察至燕而金已入寇擁之北去道遇金
太子幹離不粹之使拜至於衣袂顛倒察終不屈以是
見殺及喪還自得奉其骨避地泉州因家焉自得博學
能文章以父死事補官至漕使所著有至樂齋文集三
十卷子伯壽伯成同登隆興元年進士伯壽工文而薄
於行伯成受業朱熹仕至龍圖閣學士其居官好持論
強諫不媿其家所著有竹隱集三十卷奏議十卷蓋志
六卷

趙庚夫者宋諸趙支屬也

蔚按庚夫
字仲白

居於莆田庚夫舉

進士不第以宗子取蘊結無聊恆發之於詩嘗自刪取
五百首既沒劉克莊復刪之得百首稱山中集屬趙以
夫序而傳之

趙必暉字伯暉太宗十世孫也當宋末造從端宗至福
州爲承議郎居數月帝幸泉州招撫使蒲壽庚謀以泉
州降元遣兵逼必暉使草降表必暉遽引刀自頸不殊
壽庚乃舍之旣而壽庚盡縛諸宗室將坑之於是錄曹
參軍吳伯厚以計脫必暉操之亡後必暉遂居泉之東
陵有茹芝東陵等集

張德字孟浩橫渠先生九世孫也德生於金谿以寶祐四年進士爲太常博士知邵武縣是時天下已亂羣盜蝟起德捕盜至建陽遂解印綬爲賓朋德居建陽以詩爲業諸建陽名士皆與唱酬相樂也及宋亡乃作詩寄劉須溪曰首陽餓夫甘一死叩馬何曾罪受幸斜川頭上漉酒巾義熙已後爲全人吾聞大椿八千春幾見滄海飛黃塵太空日月兩枝燭偏照有情歌與哭歌聲不似哭聲多淚漲一江春水綠蒼天可望不可到幾欲哀鳴心草草當時若有堅剛腸豈謂鉞山堪踢倒乾坤有

限天何云方今天下書同文歲寒尙有須溪君十年閨
遠不相聞紛紛兒女犬羊念惟覩青原山不變平生五
色爛胸中留與睢陽同一傳嗚呼古人不復見地凍天
寒正冰霰德卒有于湖集數卷

論曰宋二祖豈非有道之長哉靖康之世舉宗北遷
康王以出使得免復延九世及壽庚肆虐必瞍亡命
至今苗裔不乏焉傅察可謂烈丈夫矣張德大儒之
後觀其寄劉須溪詩有足多者世有人非倖也

東越文苑卷之四終

東越文苑卷之五

明侯官陳鳴鶴汝翔輯撰

趙世顯仁甫訂正

邑後學郭柏蔚增訂

元東越文苑列傳第五

陳普者字尙德甯德人也居於邑之石塘學者稱之曰石堂先生而普則自以愚齋爲稱道之不明夫子之業或墜焉吾愚已普產於宋之季世適元世祖以左袵代宋天下方馳於牛鼎以輔新朝普獨恥之退而與弟子

讀書明道始於四書六經而及於律呂天文地志算數之術無不各臻其妙普之教弟子也惟踐履是務急悞悞以從若夫鉛槧之役鴻藻之技非所及焉故普所爲文及詠史詩二十餘卷具率其胸臆非有艷發綴於詞林然普精於算以推律呂刻漏不爽黍粟有算書詞林重之蔚按通志陳普著有四書句解鈴鍵學庸旨要孟子纂圖四書五經講義書傳補遺易經解註易說渾天儀論天象賦咏史詩斷凡二十二卷其後邑有陳自新治五經而獨以易數顓門本於傳義衍以皇極經世書自新亦著書曰起興集

毛直方字靜可建安人宋咸淳中郡薦之未用也世祖
之世直方授徒以教所著有詩宗羣玉府有詩學大成
有聊復軒文集二十卷蔚按建安縣志毛直方著有治
靈稿四卷聊復軒稿二十卷嘗
編詩學大成及詩宗羣
玉府三十卷行於世

林全字子貞弟合字子常福清人當元之初與二人者
自以其高祖適至其父公遇四世臣宋故遂不臣於元
植梅百株而結廬居於其閒以著書至元中臺郡進言
上上詔徵其所著書授以官兄弟並辭不受全有小孤
山人集當宋季時福清有兩林全其前林全事宋爲監

丞有子曰空齋者失其名景炎末以故知縣散其家財
募少年爲宋狗下永福旣而復陷遂盛服坐堂上死之
或曰死宋者卽子貞林全號曰空齋其實非也

郭墜字德基長樂人墜弱冠以經藝顯名學士皆北面
之至元中舉遺逸爲吳江教授卒門人私謚純德先生
墜之詩文和平沉深不事琢鏤稱梅西先生集

蔚按二十卷

王都中字邦翰一字元俞福甯人都中年十七事成宗
爲平江路治中累拜浙江行省參知政事名聞天下有

本齋詩集三卷

蔚按通志都中卒
贈太師諡清獻

韓信同字伯循甯德人信同少爲文賦好駢麗語旣壯
受業陳尙德遂刊落華藻究心伊洛關閩之說延祐四
年應江浙鄉舉不合退居家教授終身不窺於戶外所
著有集史類纂及詩文十餘卷

蔚按信同著有
三禮圖說二卷

雷機字子樞建安人擢延祐中進士機年七十拜爲翰
林待制所著有易齋集黃鶴磯集碧玉環集龍川集鄞
川集環中集

蔚按機德潤之子延祐五子進士歷官閩
中平反冤獄調惠安縣尹民立像祠之

楊載字仲弘浦城人家於錢塘與虞集揭傒斯范梈齊
名世稱虞楊范揭也初吳興趙孟頫在翰林得載文讀

之大說徧贊於公卿閒載以此名譽日益盛武宗時以布衣召爲翰林院國史編修及延祐初仁宗以科目取士載首應詔登進士有詩集行於世

黃鎮成字元鎮邵武人延祐中鎮成隱居南山諸公以爲賢屢薦之不起因作寫懷詩曰白日不停馭頽波竟東馳忽忽年歲改念此將安歸我欲驅車行太行路嶮巖我欲駕方舟滄海無津涯豈不顧行邁出門幘所之有田南山下可以供盛筵有廬在中田可以譚詩書上探羲皇際下及商周時賢聖尙淪落微生何足疑懷哉

羨門子千載以爲期鎮成於是遂終身不仕遍歷楚漢
名山周流燕趙齊魯之墟浮海而返登海中普陀落迦

山慷慨賦詩翛然有蟬蛻塵囂之志所著秋聲集十卷

語多奇警

蔚按元鎮著有尙書通考周
易通義中庸章指性理發蒙

林泉生字清源永福人生而穎悟讀書一過輒通爲文

以雅健詩以豪逸著聲於時天厯中登進士第

蔚按天
厯二年

進士同知福清州事泉生雖儒者而善爲兵擊淨海賊於
海上盡襲殺之擢知州事有惠愛於民盜賊不敢窺其
境上召爲翰林直學士卒諡文敏所著有春秋論斷有

覺是集

蔚按府志林泉生與盧琦陳旅林以順稱閩中文學著覺是集二十卷

【四百零七字】

吳鑒閩縣人鑒爲文詞簡潔清新爲一時推重其文集多散逸獨殘編斷簡士大夫家往往有存者

黃清老字子肅邵武人清老五歲日誦數千言通於經術習於文詞長擢進士第累官翰林國子院編修當元之季聲詩委弱清老詩獨幽逸俊雅足挽頽風所著有樵水集

林廣發字明卿龍溪人至正閒爲安溪校官

蔚按漳州府志廣發

以部使者薦授安溪學職普寇作奉府檄招降以功授其縣主簿每俘至委訊輒曰此平民也府帥問何以辨

日獲於巢穴者爲賊獲於井里者爲民此俘皆於井里
得之何謂賊自是俘至多免死福建分省置汀漳屯田
萬戶府以廣發爲其府經歷未久卒廣發居家孝友言行一軌於禮安溪
自令丞以下無不尊之爲師所著有三溪集蔚按三溪
者宋高東

溪登陳北溪淳蔡南溪汝
作也廣發皆向慕之故云

陳旅字眾仲莆田人旅爲詩文高古事元順宗順宗以
旅儒雅拜浙江儒學提舉遷應奉翰林旅雅好山水聞
有佳處輒閒步往坐卧其中晝夜游不厭得句則欣躍
而歸時人不識也薩天錫贈之詩曰江南少識陳眾仲
闕下才名北斗齊直閣每從花底見揮毫曾向御前題

觀魚小海鳳新浴立馬上林鶯亂啼今日西湖堤上路
獨騎欵段踏春泥陳旅嘗過虞集與集譚詩集嘆曰此
所謂我老歸休付子斯文者也遂舍旅食飲之以爲石

交旅官至國子監丞有安雅堂集行於世

蔚按陳眾仲號荔溪著安

雅堂詩文集十三卷虞集爲之序

彭炳字元亮崇安人炳游於齊秦駙馬烏谷孫雅知炳
賢聞炳至遂先爲除舍郊勞從者執弟子之禮身親往
師之由是炳名籍籍起至正末徵爲端本堂說書不就
也炳之詩以陶柳爲宗有集一卷

林清閩縣人晉晉安太守林祿之苗裔也清以家世自負恥事胡元遂變姓名匿居山寺會郡太守校黃籍於是以前暇時問僧曰寺有異人乎僧曰有桐帽而衣褐者常寄食飲寺中居甚貧而歌吟自好不肯受憐於人意者其是矣太守卽召見之問能詩乎曰能是時方以八音編黃籍太守卽以命題林清卽應聲曰金紫何曾一掛懷石田茅舍自天開絲竿釣月江頭住竹杖挑雲嶺上來匏實曉收栽藥圃土花春長讀書臺革除一點浮雲慮木筆題詩酒數杯太守大驚異之問清姓名清

以詭對於是太守乃客清而觴之與之論海濱人物太守曰吾聞閩有林清者雄才碩德足師也惜未見其人耳清不覺色動太守曰君殆林清耶清曰吾方媿不若清耳若清者公安得而見之大守大笑遂盡驩而罷明日訪之則亡於是太守使人遍閩中物色之終不復見乃知曩者固清也清曾孫誌明永樂閒爲翰林院侍讀別有傳

吳海字朝宗閩縣人父某仕元爲涪州令嘗樂鄒魯之風勅海徙居之未能也海因自稱魯客志其未得返於

魯也今雖在閩吾客也雖道四方亦客也他日至於魯而止焉則爲魯人矣海度元有亡徵終無可奈何遂不宦事元及明興以家世爲元臣亦不宦事明會部使者盡薦其賢召赴史局海遂稱疾篤固辭如更逼令驅使甯受罪責不悔也海與人交務在甚之於道不爲依阿趨和元湖州路總管王翰屏居永福山中與海相得驩甚我太祖皇帝使使者疆起翰將用之海聞命下卽白衣冠往弔未至舍而得翰書與訣入門而翰自又死世謂吳處士逼死翰也翰旣死海撫其孤教之孤傅最知

名別有傳孤修以文學應郡舉爲訓導海所著命本一卷書禍一卷聞過齋文集八卷

陳信惠字孚中晉江人初爲舉子業試有司不中去而學古文詞乃以才能應帥府辟爲順昌尹有中齋集

杜本字伯原本清江人移家於武夷至正壬午以翰林待制聘修三史強起至武林因辭疾不行所著有清江

碧嶂集又編五聲韻自大小篆分隸真草以至化蕃胡

元蒙古新字靡不收錄

蔚按建甯府志杜本字清碧皇慶初選御史大夫忽刺木薦至

京師不果用文宗初立遣使召不赴書無逸篇附進至正中大臣奏授翰林院待制兼國史院編修官本以疾

留武林後歸武夷卒
有清江碧嶂詩一卷

論曰閩稱海濱鄒魯俗多皎節馳於義以故胡元之
興百有餘年懷鉛之士未有肯通籍至大官者往往
剗迹以遊其志及其末乃有吳海之屬爲之守節若
魯不下漢無媿於魯客矣

東越文苑卷之五終